

## TAITAASI

# Poruva Taitaasirani qara vara kyora

Iesusira qati vara sivuma kyovaro nyaamwuni uro varuvaro 36 ihive nritarovaro Poruva qaiqaa karavuqi variqaro mwaa quara qara ntumwa tora.

Taitaasiva hia Iutaa vaisi nai mpo mwatanaavanto Iesusira nraaqiaraqama viro varuvaro Poruva mwianra mwataama kyera nraakye qora Kotira aanra nyaamwutaante tiqaro Taitaasirani qara ntumwa tora.

<sup>1</sup> Nte Poruva Kotira kyaiqa vaisi varuvama. Kotiva ni nronraqama kyaihana nte Iesusi Karaisira qua timwa nyiqi vi varuvama varina.

Kotiva nai kyaama tai nraakye qorahua Karaisirara kepuqyaqama kye variqi viqata quataa qua okyara riemwaqi quate tiro, Kotiva ni titairave.

<sup>2</sup> Kotiva hia unra qua ti variva haaru hia mwaa mwataru ututo entaraqaa nai kyauqu nriqiqaa vatero tiqaro, Ntena kyaama taani nraakye qorahua ekyaa enta qati variqi vivarave, tura. Mwianra rieqanama nte nraakye qora timwa nyiqanama, Nkye Kotirara kepuqyaqama kye riemwaqi viqatama mwi entara vekya variqi quate, ti varurave.

<sup>3</sup> Kotiva nai kyaama tai nraakye qorahua ekyaa enta qati variqi vivarave timwa kyero variqi vuvaro nai timwa to entaraqaa Iesusi Karaisiva

tumu ntero Kotira qua qaraakya qua qovarama kyora. Mwi quara nraakye qora timwa nyiqira quante tiro, Kotiva tiri huvantu timwa taariva, mwiva ni nronraqama kyaihana nte mwi quara nraakye qora timwa nyiqi vi varuvama varina.

<sup>4</sup> Taitaasio, nte mwaa quara inima qara ntumwa tena. Tiretana Karaisira qua kuua qua nraahu riemwaqi vi varunanranra tina, nte iara ni mwaaquve turave. Kotiva tiri tiqovavata Iesusi Karaisiva tiri kyaahaqa hiarivavata i kyuqema mwataivaro i mwutukyaqitairo qihakya hi vari-rara variana.

*Mwaa quara rieqara vaisi nronraqama kyairata Jesusira nraakye qoraqaa ntaqikyiate tura*

<sup>5</sup> Iara nte hia taiqa kyaani kyaiqara ntapihi kyera taiqa kyera mpo mwatukya mpo mwatukyaqitaira vaisi nronraqama kyairata Jesusira nraakye qoraqaa ntaqikyiqi quate tina, nte Kiritini i kyena nrunrave. Qio nte mwini variqana i timwa mwiava quara riemwa taante.

<sup>6</sup> E vaisi nronraqama kyarera hira mwataama variani vaisira nronraqama kyaante:

Mwi vaisiva varirata nraakye qoravanto hia mwianra uaquia hi kyaiqara utiho timwa kye mwiaqaa qua vate-vama variari.

Mwi vaisiva nraakye kuua varataarivama vari-ari.

Mwi vaisira nraaqiaravantovata Karaisira qua riemwaqi viqata mwihuavata hia api aanra nrohiraitita, nkyiari nyohua sohua qua

nraahuma riemwaqi quata.

<sup>7</sup> Mwi vaisiva Kotira kyaiqaqaa ntaqikyiqiro  
quaninranra tiro,  
qora kyaiqa varaa ni quava hia mwiaqaa vahiari.  
Mwi vaisiva hia nai quara nraahu kyuquerave  
timwaqiro quari.

Mwi vaisiva hia qamwanrama kyeqaro raraqa  
taariva variari.

Mwi vaisiva hia nramanri nrenro uera ntaari  
vaisiva variari.

Hia mwi vaisira raraqa tairaro qamwanrama  
kyeqaro mpohua  
ntuquutariva variari.

Hia munimanra mpinqiavata mwutukya ntuaari  
vaisiva variari.

<sup>8</sup> Mwi vaisiva nyianrasai nrihu kyarave qi-  
atomwave nyianrivama  
variari. Mwiva kyuqe okyarara mwutukya  
vahiarivama  
variari.

Mwi vaisiva naiqa kyuqema kye ntaqikyiarivama  
variari.

Mwiva avuqavuma kyero nrohiari vaisivama  
variari.

Mwiva kytataqama kye variari.

Mwiva nai kyaiqa vutu nteqaro varaa vaise-  
vama variari.

<sup>9</sup> Qutaa qua mwia timwa mwia quara mwi vaisiva  
tuqara kyero

tutaari vaisivama variari.

Mwiva mwitaahiai vaisiva variqaro qiomaa  
mpohuavata kyaahaqama

nyataari.

Mwiva mwitaamaqiro viqaro api qua ti vaisihua  
quavata

nraatara kyairata mwihua nkyiari api qua ntapihi kyaata.

*Mwaanra apiqama kye ti vaisihuara rauriqara variante tura*

<sup>10</sup> Vaisi airivanto mwihua kepuuyaqama kye Iutaa mwaanra okyarara rie variahua, mwihua tiri quara qoririma kyeqata mwihua qumina qua unra qua nraahu timwa nyiqi vi variarave.

<sup>11</sup> Mwihua munimanra nraahu rieqata api qua ti variavata mwihua quaqaara mpo nraamwu mpo nraamwuqi variahua apiqama vivi hiarave. Mwihua uaqia hi quara ti variarara tira, e mwihua qaqira kyeta tirema variate qianta.

<sup>12</sup> Kiriti vaisi mpovanto nraakiara qovara hian-inranra timwa nyi varu vaisiva haaru variqaro nai nramwunaahuara mwitaama tiro:  
Kiritiqinaahua unra qua nraahu ti variahuate.  
Mwihua qaakyau quara vairi nraantantamwa kye

variarave. Mwihua hia kyaiqa vararaitita, qumina aanra nrohiqata kyara nraahu kyovi kyaavirama kye nre variarave, tura.

<sup>13</sup> Haaru mwi vaisiva tuva qutaama vahiro. Mwianra rieqarama mwi mwatanaahuara kepuuyaqama kyera tiqara, Qora qua qaqira kyeta kyuqe qua nraahu riemwaqi quate, qianta.

<sup>14</sup> Iutaavanto uri qua tira hia riaate, qianta. Vaisi mponramwuvanto nkyiari riemwa kyeta hia mwitaa mwataa hiate ti quaravata hia riaate, qianta.

<sup>15</sup> Kyuqe vu nraato vahiari vaisiva variqaro mwiva ekyaa inraikyara kyuqe inraikyavema

qiananro. Vaisi mpovanto hia Iesusirara quitaave qiariva ua vu nraato vahiariva hiama qio mpo in-raikyaravata kyuqe inraikyave qiananro. Mwia vu nraato mwutukyaqitairo apiqama quaninranra tiro, mwiva ekya a inraikyara qora in-raikyavema qiananro.

<sup>16</sup> Mwitaa hia vaisihua nkyiari nyoqitai tiqata, Tire Kotirara rieqata nrohi varurahuave, timwa kyeqata variavaro mwihuua kyaiqvanto mpovau vaihata Kotira qoriri hi kyaiqara varaqi vi variarave. Mwihuua mwitaama kye nrohi variavaro Kotiva mwihuara qua raaqute varia vaisihuave tirave. Mwihuua Kotira qua raaqute variarara tiro, kyuqe kyaiqvanto hiama qio mwihuaci vahiananrove.

## 2

### *Qua mwaanra kyuqerara tura*

<sup>1</sup> Mwihuua api qua timwa nyivara e kyuqe qua nraahu timwa nyiqinra quante. E nraakyte qora mwaanra qua kyuqera timwa nyiqanra mwataama kyeta nkye mwi quara rieqata nrohiate qianta.

<sup>2</sup> Nyaapai mwihuua mwataama kyera timwa nyiana: Nkye hia nramanri nreta uera ntaraitita, nkye kyuqe vu nraato vahirata nkyeta mwamwanta mwutukyaqaa kyuqema kye ntaqikyiqi nrohiate. Karaisira qua anomakye rieqata variqi quate. Mpohuara mwutukya vahirata variqi viqata hia pupohairata kepukyaqama kye Kotira aanraqaa variqi quate, qianta.

<sup>3</sup> Kyontavata mwataama kyera timwa nyante: Nkye Kotiranivanto variarara tita, kyonataqama kye variqi quate. Hia mpora nrutu vara mwataniqa hiqata qora qua qiata. Uainivanto nkyi kyonta ntavaaqavu kyaankyorave, qiante. Kyonta nronra tuaari nraakyeva qaraakya nraakye aanra kyuqera nraamwutairaro <sup>4</sup> mwiva kyuqema kyero nai vaatiaravata, nai nraaqiararavata, mwutukya vahiraro variari.

<sup>5</sup> Nronra tuaari nraakyeva qaraakya nraakye nraamwutairaro kyuqema kyero nrohiqaro hia mpo vaisiara riaraitiro, nraamwu maataqaa kyuqema kyero ntaqikyiqaro nai vaati qua nraahu riemwaqiro viraro mpovanto mwia kyaiqa taqero hiama Kotira quara uaqia hi quarave qiananro.

<sup>6</sup> Qaraakya vaisiaravata mwataa qiante: Uaqia hi kyaiqara utuaro tita kyuqema kye nkyeta mwamwantaqaa ntaqikyiqi quate, qiante.

<sup>7</sup> Taitaasio, e ena mwiva mpo kyaiqa mpo kyaiqa vareqara kyuqe kyaiqa nraahu varaqira virata qaraakya vaisivanto i kyaiqa taqeta mwihuavata kyuqe kyaiqa varaqita quate. E nraakye qora Kotira aanra nyaamwuteqara hia nroqitaira nraahu qiante. Qua timwa nyiqanra qua mwia vataqi vira mwitaa mwitaa hiante. Hia uqen-raaqenrama kye tiraitira, mwi quarara nronra qua qutaa vahirave qiate tira, kepukyaqama kyera qiante.

<sup>8</sup> E ntapihi vahiani quara nraahu timwa nyiqira virata hia iara api qua tiho qiata. Mwitaa timwaqira virata tiri nramwutaahua tiriqaa qora

qua vateva hia vahirata mwihua nkyiari kyaurata.

<sup>9</sup> Rupataavata quminaqama kye kyaiqa vare varia vaisihuara mwataa qiante: Nkyiqa ntaqikyiani vaisira qamwata mwateqata mwia qua riemwaqi quate. Hia mwianra qora qua qiate.

<sup>10</sup> Mwiva vataani inraikyara hia mpuara varaate. Nkye mwia kyaiqa kyuqema kye varaqi vivaro mwi vaisiva nkyiara kyuqe vaisi nraahuve timwa kyero Kotiva tiri huvantu kyaiva timwa tai quarara kyuqe quave qiare, qiante.

<sup>11</sup> Tire ntapihi kyaunananrave. Ekyaa nraakye qora huvantu vita qio variate tiro, Kotiva nai kyuqema nyataani okyarara qovarama kyairave.

<sup>12</sup> Tire mwi okyarara rieqatama hia Kotira qoririma mwataraitita, mwatanyaa inraikyara hia mwutukya ntiraqeta tetqa kyuqema kye ntaqikyiqata ntapihi kye nrohiqata mwaa entara Kotira kyaiqa nraahu varaqi quaravama vahiro.

<sup>13</sup> Tire mwitaamaqi viqata tiri kyuqema timwa taani entara vekya varunanra. Mwi entara tiri mwanriqa nronravanto tiri huvantu timwa taariva Iesusi Karaisiva, mwia peqa okyaravanto omwa votima kyero itero takyuqi variraro qoqaa tumu ntaananrove.

<sup>14</sup> Uaqia hi kyaiqava tiri rupa taankyo tiro, mwiva tiriara rieqaro tiri huvantu timwa tarero qutu vurave. Mwiva tiriara kyai mwihua hiqama nyataarita mwihua ni nraakye qora variqata kyuqe kyaiqa nraahu varaqi quate tiro, mwianra rieqaro qutu vurave.

<sup>15</sup> Qio e mwi quara nraakye qora timwa nyiqira quante. E nronra vaisivanto variqarara tira, kepukyaqama kyera nraakye qora mwi kyaiqara mwitaa mwataama kye vareqata mwi kyaiqara hia varaate qianta. Haunri vaisi mpovanto iara qumina vaisive qiankyorave.

### 3

#### *Mwataama kyeqata Kotira aanraqaa nrohiate qianta tura*

<sup>1</sup> Nraakye qora timwa nyiqanrama kaman-inra nronra vaisive, kamaniva nronraqama kyai vaisihuave, mwihua qua hia raaqutaraaitita, mwihua qua riemwaqi quate quante. Mpo kyaiqa mpo kyaiqa kyuqe kyaiqa vahianinra qamwan-rama varehua terama viqata variate qianta.

<sup>2</sup> Mpohua nyutu mwataniqa hiarive titi mwihuaqaa unra qua vatevorave qianta. Tirema variqata nanrianra nanrianra qamwateqata variate qianta. Henahuara qihaakyamaqi viqata variqi quate qianta.

<sup>3</sup> E ntapihiananrave. Haaru tire qumimaqa hiqata qua nteqa kyeta apiqa hiqata nrohi variavanranrave. Mwi entara api nrohiaravave, apiqa qamwataaravave, mwi inraikyava nraahu tiri rupa tovata variavanranrave. Tire mwi entara mpohua uaqiamma nyateqata kyaru kyaaruma nyate variavanranrave. Tire mpohua nramwutaaqama nyate variavarata mwihua titi mwitaama timwa te varurave.

<sup>4</sup> Tire mwitaamaqi vi variavararo Kotiva tiri huvantu timwa taariva, mwiva nai kyuqema timwa taaninra mwia mwutukyavanto tiriara

vahianinra qovarama kyero <sup>5</sup> tiriara apiqama kye variqi vivorave timwa kyero mwiva tiri huvantu timwa torave. Mwiva hia tire kyuqe kyaiqa mpo kyaiqa mpo kyaiqa varaavanranra rieqaro tiri huvantu timwa toravauma. Mwiva nai tiriara po kye timwa timwa taaninranra rieqaro tiri huvantu timwa torave. Mwiva tiri hiqama timwa taihata tire qaraakya vaisi utuvita varuraro mwia mwanraquravanto tiri qaraakyaqama kyaihata variqi vi varunanrave.

<sup>6</sup> Iesusi Karaisiva tiri huvantu timwa taariva tiriara rieqaro kyaiqa varorara tiro, Kotiva qihakyama kyero nai mwanraqura tiri timwi vari-rave.

<sup>7</sup> Kotiva kyuqema timwa tairaqaatairo tiriqaa qua vahiva taiqa vihata tire mwia nraaqiaraqama vita variqata mwiavata ekya enta qati variqi quananra mwia vekyama varuro.

<sup>8</sup> Mwi quava qutaa quama vahiro. E mwi quara kepukyaqama kyeqara timwa nyiqira vira-ta Kotirara qutaave ti nraakte qorahua mpo-qama kye kyuqe kyaiqa varerara nraato tuqita quata. Mwihua mwitaamaqi viqata qioma mpo-huavata kyaahaqa hivara.

<sup>9</sup> Qumina inronra hi quarave, nkyiari haivaqahua okyarara nraahu nronraqama kye rie vari quarave, antua quave, Mosesira mwaanra qua kyaara inronra hi quarave, ekya mwi quara mwi quara tihua nraaqani hia uro variante. Mwi quava hiama qio vaisi kyaahaqa hiananro. Hiama mwi quaraqaatairo kyuqe inraikyavanto qovara hiananro.

**10** Vaisi mpovanto inronra hiqaro Iesusira nraakye qora ntainra kyarera uti varirera, e mwi vaisirara hia mwitaa hiante tiraro hia riairara qaiqaa mponanivata qianta. Mwitaa tiraro qio hia riairara mwi vaisira qorrima kyera mwoqa mwjante.

**11** E ntapihi kyaananrave. Mwitaa hia vaisihua apiqama quavaro nkyiari qora kyaiqvanto vara uaqama kyaihata nronra qua varavao.

### *Ekyaara qua tura*

**12** Nte Atemaasikya Tikikaasikya titaarita mwini uro ntaivara e Nikoporisini nte uro varianinrani quante. Huari hia kyuqema kyero itaani entara nte uro mwinima varianinra.

**13** Sinasiva ko okyara ntapihi paahima kyero rie vari vaisivavata, Aporosivavata, mwitanahua nyianra aanraqaa virera hiatanahua kyuqema kyera kyaahaqama nyatairata aanraqaa viqata hia mpo inraikyara aaranteta puua hiata.

**14** Tiri nraakye qoravanto hia kyaiqa vararaitita, qumina varivaro kyarave mpo inraikya hia vahirata aara ntevorave tira, mwihuara kyuqema kye kyaiqa varaqi vi varivaro ekyaa mwi inraikyava nkyini qio vahiarive qianta.

**15** Nivatama kye variahua i qua mwantaavo. Karaisira qua riaahua tiriara mwutukya vaihata variahua, qua mwantaunana timwa nyiante.

Kotiva nkyi kyuqema nyatairata variate, tuqo.

**QARAAKYA QUA TIMWATORA  
The New Testament in the Omwunra-Toqura (South  
Tairora) Language of Papua New Guinea  
Nupela Testamen long tokples Omwurna-Toqura long  
Niugini**

copyright © 2000 Wycliffe Bible Translators, Inc.

Language: Omwunra-Toqura (South Tairora) (Tairora, South)

Dialect: Omwunra-Toqura

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files  
dated 9 Oct 2020

73e2f29d-4ca4-50e6-a471-722ac8ab5666